

Na osnovu člana 59. stav (1) Zakona o visokom obrazovanju, člana 22. Zakona o dopunskim pravima boraca („Sl. novine broj: 3/07, 13/09), te člana 75. stav 2. Statuta Univerziteta u Tuzli, Senat Univerziteta u Tuzli na sjednici održanoj dana 18.05. 2011. godine donio je

**PRAVILNIK
O USLOVIMA, KRITERIJIMA I POSTUPKU PRIJEMA STUDENATA U
STUDENTSKE DOMOVE STUDENTSKOG CENTRA UNIVERZITETA U
TUZLI**

I OPŠTE ODREDBE

Član 1.

Pravilnikom o uslovima kriterijima i postupku prijema studenata u studentske domove Studentskog centra Univerziteta u Tuzli (u daljem tekstu: Pravilnik) uređuju se: uslovi, kriteriji, postupak i organi nadležni za prijem studenata u studentske domove Studentskog centra Univerziteta u Tuzli; smještaj studenata u studentske domove; otkaz ugovora o prijemu studenata u studentske domove Studentskog centra Univerziteta u Tuzli (u daljem tekstu: Studentski centar).

II USLOVI ZA PRIJEM STUDENATA U STUDENTSKE DOMOVE

Član 2.

Pravo na prijem u studentske domove Studentskog centra imaju redovni studenti Akademije i fakulteta Univerziteta u Tuzli (u daljem tekstu: fakultet) pod slijedećim uslovima:

- da su prvi put upisali prvu, odnosno narednu godinu studija;
- da je mjesto njihovog prebivališta, odnosno boravišta udaljeno od Tuzle više od 30 kilometara;
- da imaju opštu zdravstvenu sposobnost.

Student kojem je u tekućoj školskoj godini izrečena disciplinska mjera isključenja sa fakulteta ili isključenje iz studentskog doma ne može biti primljen u studentski dom u narednoj školskoj godini.

Član 3.

Ukoliko se smještajni kapaciteti u studentskim domovima ne popune redovnim studentima koji prvi put upisuju prvu, odnosno narednu godinu studija, pravo na prijem u studentske domove imaju redovni studenti koji obnavljaju godinu, po punoj ekonomskoj cijeni.

Prijem redovnih studenata koji obnavljaju studijsku godinu na nepopunjena mjesta u studentskim domovima vrši se na način i po postupku utvrđenom članovima 6. – 8. ovog Pravilnika.

III KRITERIJI ZA PRIJEM STUDENATA U STUDENTSKE DOMOVE

Član 4.

Rangiranje studenata za prijem u studentske domove vrši se na osnovu slijedećih kriterija:

- | | |
|--|-----------|
| 1. uspjeh u studiju..... | 40 bodova |
| 2. materijalni položaj..... | 35 bodova |
| 3. pravo prioriteta pri smještaju..... | 25 bodova |

Maksimalan broj bodova po osnovu utvrđenih kriterija iznosi 100 bodova.

Član 5.

Po kriteriju „uspjeh u studiju“ studentu pripada slijedeći broj bodova:

- za ostvarenu prosječnu ocjenu 9,0 do 10 u prethodnoj godini studija, odnosno prosječnu ocjenu 5,0 u srednjoj školi za studente prve godine 40 bodova
- za ostvarenu prosječnu ocjenu 8,0 do 8,9 u prethodnoj godini studija, odnosno prosječnu ocjenu 4,0 do 4,9 u srednjoj školi 30 bodova
- za ostvarenu prosječnu ocjenu 7,0 do 7,9 u prethodnoj godini studija, odnosno prosječnu ocjenu 3,0 do 3,9 u srednjoj školi 20 bodova
- za ostvarenu prosječnu ocjenu 6,0 do 6,9 u prethodnim godinama studija, odnosno prosječnu ocjenu 2,0 do 2,9 u srednjoj školi 10 bodova.

Član 6.

Po kriteriju „materijalni položaj“ studentu pripada slijedeći broj bodova:

- bez prihoda po članu užeg porodičnog domaćinstva..... 35 bodova
- student iz porodice korisnika socijalne pomoći..... 30 bodova
- prihodi po članu užeg porodičnog domaćinstva do 30 % od prosječne plate u Federaciji BiH..... 25 bodova
- prihodi po članu užeg porodičnog domaćinstva od 31 %-50% od prosječne plate u Federaciji BiH..... 20 bodova
- prihodi po članu užeg porodičnog domaćinstva od 51 %-70% od prosječne plate u Federaciji BiH..... 15 bodova
- prihodi po članu užeg porodičnog domaćinstva preko 70 % od prosječne plate u Federaciji BiH..... 5 bodova.

Prilikom primjene ovog kriterija, u obzir se uzima prosječna plata u F BiH prema posljednjem objavljenom podatku Federalnog zavoda za statistiku.

Pod članovima užeg porodičnog domaćinstva, u smislu ovog Pravilnika, podrazumijevaju se: roditelji, braća i sestre, a ako je student u braku: bračni drug i djeca.

Član 7.

(1) Po kriteriju „prioriteta pri smještaju“ studentu pripada slijedeći broj bodova:

- studentu RVI:
 - invalidnost od 70% - 100%..... 25 bodova
 - invalidnost od 50% - 69%..... 20 bodova
- studentu iz porodice RVI:
 - invalidnost od 70% - 100%..... 20 bodova
 - invalidnost od 50% - 69%..... 15 bodova
 - invalidnost od 50%..... 10 bodova
- studentu iz porodice šehida ili poginulog borca..... 20 bodova
- studentu civilni/mirnodopski vojni invalid:
 - invalidnost od 70% - 100%..... 20 bodova
 - invalidnost od 50% - 69%..... 15 bodova
 - invalidnost od 50%..... 10 bodova

- studentu demobilisanom borcu oružanih snaga BiH..... 10 bodova
- studentu iz porodice demobilisanog borca oružanih snaga BiH..... 5 bodova
- student koji ima status izbjeglog ili raseljenog lica..... 10 bodova

Po kriterijima iz prethodnog stava student može ostvariti,
po svim osnovama, najviše 25 bodova .

Studentu bez oba roditelja..... 60 bodova.

Član 8.

U slučaju ostvarenog istog broja bodova na rang listi prednost pri prijemu student ostvaruje po slijedećem redosljedu:

- student iz porodice šehida ili poginulog borca;
- student RVI ili student iz porodice RVI sa većim procentom invalidnosti pri čemu se uzima u obzir raspon invalidnosti od 60% do 100%;
- student lošijeg materijalnog položaja;
- student demobilisani borac oružanih snaga BiH ili student iz porodice demobilisanog borca oružanih snaga BiH.

IV POSTUPAK I ORGANI NADLEŽNI ZA PRIJEM STUDENATA U STUDENTSKE DOMOVE

Član 9.

Prijem studenata u studentske domove vrši se na osnovu javnog konkursa, koji za svaku akademsku godinu raspisuje Senat Univerziteta u Tuzli (u daljem tekstu: Univerzitet) najkasnije do 20. jula tekuće godine.

Konkurs se objavljuje u sredstvima javnog informisanja i na Web stranici Univerziteta.

Zaduživanje studenata u domove počinje 15. septembra tekuće godine.

Konkurs ostaje otvoren 8 dana od dana objavljivanja.

Član 10.

Konkurs za prijem studenata sadrži:

- broj studenata koji se prema raspoloživim kapacitetima Studentskog centra, može primiti u narednoj školskoj godini;
- uslove za prijem u studentske domove;
- rok za podnošenje prijave na konkurs;
- dokumenta koja se prilažu uz prijavu.

Uz prijavu na Konkurs kandidat je dužan dostaviti slijedeću dokumentaciju:

1. uvjerenje da je redovan student i da prvi put upisuje prvu, odnosno narednu godinu studija;
2. potvrdu o mjestu prebivališta, odnosno boravišta (CIPS-ov dokument – kopija)
3. uvjerenje o prosječnoj ocjeni ostvarenoj u prethodnim godinama studija, odnosno u srednjoj školi;
4. uvjerenje o zajedničkom domaćinstvu (kućna lista);
5. potvrdu o prosječnoj plaći za svakog zaposlenog člana užeg porodičnog domaćinstva ostvarenoj u posljednja tri mjeseca, odnosno ovjerena fotokopija tri zadnja čeka od penzije za svakog člana užeg porodičnog domaćinstva koji primaju penziju;
6. uvjerenje o katastarskom prihodu svakog člana užeg porodičnog domaćinstva iz prethodne godine;

7. uvjerenje za članove užeg porodičnog domaćinstva koji se nalaze na evidenciji Zavoda za zapošljavanje;
8. uvjerenje da je student iz porodice koja je korisnik socijalne pomoći i visini te pomoći;
9. uvjerenje da je student izbjeglo i raseljeno lice;
10. uvjerenje da je student iz porodice šehida ili poginulog borca;
11. uvjerenje da je student RVI ili član porodice ratnog vojnog invalida sa procentom invalidnosti;
12. uvjerenje da je student invalid ili član iz porodice invalida sa procentom invalidnosti;
13. uvjerenje o učešću u oružanim snagama BiH studenta ili člana užeg porodičnog domaćinstva;
14. Izvod iz matične knjige umrlih za slučaj iz člana 7. stav (3) Pravilnika.

Član 11.

Prijave na konkurs sa potrebnom dokumentacijom podnose se Studentskom centru u roku od 15 dana od dana njegovog objavljivanja.

Student kojem je u tekućoj školskoj godini izrečena disciplinska mjera za težu povredu obaveze nema prava učešća na konkursu.

Student koji do dana objavljivanja konkursa nije izmirio svoje ugovorene obaveze iz tekuće i prethodnih školskih godina prema Studentskom centru nema pravo učešća na konkursu.

Član 12.

Neblagovremene i nepotpune prijave ne uzimaju se u razmatranje.

Član 13.

Studenti starijih godina fakulteta ukoliko do završetka ispitnih rokova tekuće školske godine ne prilože uvjerenje o upisu na fakultet za narednu školsku godinu gube pravo na smještaj u domove.

Član 14.

Postupak prijema studenata u studentske domove provodi komisija koju imenuje Senat Univerziteta.

Komisija se sastoji od 5 (pet) članova, od kojih su 3 (tri) iz reda zaposlenika i 2 (dva) iz reda studenata.

Član 15.

Komisija vrši svoje nadležnosti na sjednicama koje saziva predsjednik, kojeg biraju članovi Komisije iz reda svojih članova.

Bliže odredbe o načinu sazivanja sjednica, radu i načinu donošenja odluka utvrđuju se Poslovníkom o radu Komisije.

Član 16.

Komisija za prijem studenata u studentske domove je stalna komisija Senata i ima slijedeće nadležnosti:

- Planira raspodjelu kapaciteta Studentskog centra namijenjenih za stanovanje studenata, po kriterijima utvrđenim ovim Pravilnikom;
- Utvrđuje prijedlog teksta Konkursa za popunu smještajnih kapaciteta, sa kriterijima i uslovima za apliciranje zainteresovanih studenata i utvrđuje Rang listu prijavljenih kandidata;
- Objavljuje prijedlog Rang liste, razmatra prigovore na istu, te utvrđuje i objavljuje konačnu Rang listu, koja predstavlja osnov za prijem u domove Studentskog centra;

- Vršiti i druge poslove utvrđene Statutom i opštim aktom, kojim se uređuju pitanja prijema studenata u studentske domove, odnosno korištenje smještajnih kapaciteta Studentskog centra.

Član 17.

Na osnovu konačne Rang-liste zaključuje se Ugovor o prijemu studenta u studentski dom kojim se, u skladu sa ovim Pravilnikom i drugim opštim aktom Univerziteta, bliže uređuju međusobna prava i obaveze Studentskog centra i studenta.

Prilikom zaključivanja Ugovora student je dužan priložiti ljekarsko uvjerenje koje ne može biti starije od 6 mjeseci kao i tri fotografije formata 3 x 4 cm.

V SMJEŠTAJ STUDENATA U STUDENTSKE DOMOVE

Član 18.

Na osnovu zaključenog Ugovora, a najkasnije u roku od 5 dana od dana njegovog zaključivanja, vrši se pojedinačano zaduživanje i useljavanje studenata u studentske domove.

Ukoliko se u roku iz prethodnog stava ovog člana student ne javi u Studentski centar radi zaduživanja i useljavanja smatrat će se da je otkazao Ugovor.

U slučaju iz prethodnog stava, u daljem roku od 5 dana zadužit će se slijedći student sa konačne Rang liste.

Danom useljenja u studentski dom student dobiva status studenta stanara studentskog doma.

Član 19.

Studentski dom student koristi od dana zaključivanja Ugovora do isteka junsko-julskog ispitnog roka, odnosno do 15.07. tekuće godine.

Član 20.

Student koji je smješten u studentski dom obavezan je plaćati usluge smještaja i ishrane u punom iznosu do razduženja.

Član 21.

U slučaju da student ne koristi usluge smještaja u studentskom domu duže od 8 dana uzastopno, dužan je o razlozima odsustva obavijestiti direktora Studentskog centra u daljem roku od 3 dana.

Ako student ne postupi u skladu sa stavom 1. ovog člana i po povratku ne pruži valjan dokaz o opravdanosti svog odsustva (bolest i sl.) Ugovor će se otkazati.

Član 22.

Studenti koji su po osnovu Ugovora za tekuću školsku godinu koristili dom, mogu koristiti usluge smještaja u studentskom domu putem recepcije, u toku trajanja ljetnog raspusta.

Direktor Studentskog centra, uz saglasnost USUD-a i ASSD-Tuzla, utvrdit će period u kojem će studenti moći koristiti usluge recepcijskog smještaja.

Smještaj putem recepcije ne mogu koristiti studenti kojima je u tekućoj školskoj godini izrečena jedna od disciplinskih mjera.

Član 23.

Za vrijeme korištenja smještaja putem recepcije student plaća naknadu čiju visinu posebnom Odlukom utvrđuje Upravni odbor Univerziteta, na prijedlog direktora Studentskog centra u Tuzli.

Naknada iz stava 1. ovog člana ne može biti manja od ukupnih tekućih troškova.

VI OTKAZ UGOVORA

Član 24.

Ugovor o prijemu studenata u studentske domove otkazat će se:

- ako se student u utvrđenom roku ne javi radi zaduživanja i useljavanja;
- ako studentu prestane status studenta na Univerzitetu;
- ako student neopravdano ne koristi smještaj duže od 8 dana uzastopno;
- ako mu bude izrečena disciplinska mjera isključenja iz studentskog doma ili mjera isključenja sa fakulteta;
- ako do 5-og u mjesecu ne plati troškove smještaja i ishrane za prethodni mjesec.

VII ZAVRŠNE ODREDBE

Član 25.

Ovaj Pravilnik stupa na snagu danom donošenja.

Član 26.

Stupanjem na snagu ovog Pravilnika prestaje da važi Pravilnik o uslovima, kriterijima i postupku prijema studenata u studentske domove Studentskog centra Univerziteta u Tuzli broj: 03-1909/2000, od 25.09.2000. godine, i Pravilnik o izmjenama Pravilnika o uslovima, kriterijima i postupku prijema studenata u studentske domove Studentskog centra Univerziteta u Tuzli broj: 04-4045/02-7, od 13.09.2002. godine.

UNIVERZITET U TUZLI

Broj:03-3390-11.2./11

Tuzla,18.05.2011.godine

PREDSJEDNIK SENATA

Prof.dr.sc. Enver Halilović